

DE

# HELLEBORO DISCEPTATIO.

AUTHORE

IOANNE MANELPHO  
ERETANO SABINO,

Medico, & Philosopho Romano.



ROMÆ, Apud Hæredem Bartholomæi Zannetti. 1622

*Superiorum Permissu.*

*Imprimatur, ꝑ̄ videbitur Reuerendissimo Patri  
Magistro Sacri Palat. Apost.*

*A. Episc. Hierac. Vice/g.*

---

**E** Go Tiberius a fonte Medicus, Philosophus Eugubinus, ex commissione Reuerendiss. P. Fr. Nicolai Rodulfi Sacri Palatij Magistri, legi ea diligentia qua potui Opusculum Doctissimi viri Ioannis Manelfi Eretani, quod inscribitur. De Hel-leboro Disputatio, & nihil in ea inueni quod Sanctæ Rom. Eccles. repugnet, neq; quod possit pias aures offendere, neque quod aliquid contra bonos mores contineat. Datum Romæ tertia die Nouemb. 1622.

Ego idem, qui supra, manu propria.

*Imprimatur.*

Fr. Vincentius Martinellus Soc. Reuerediss. P. Fr. Nicolai Rodulfij Sac. Apost. Palat. Magist. Ord. Præd.

ILLVSTRISS. PRINCIPI

D. D. PAVLO  
SFORTIO

Patrono Colendissimo.

IOANNES MANELPHVS  
Fœlicitatem.



ISPVTATIONEM  
hanc de helleboro,  
quemadmodũ me-  
dicæ Academiæ iu-  
cundã, & utilem:

ita pariter aliquo Patrono dignam  
censeo. Cumq. tu Princeps Illu-  
strissimæ generis claritate, animi  
magnificentia, & qualibet virtu-  
tum celsitudine nemini sis secun-  
A 2 dus:

*duſ : ſub tuiſ etiam auſpicijſ eden-  
 dam curavi. Ratuſ nimirum eam  
 non minore te alacritate tuendam  
 accepturum , quam tuam ipſam  
 valetudinem mihi ſepe ſervan-  
 dam commiſeris. Vale. Romæ,  
 Die 22. Nouemb. 1622.*

Doctissimo, Eruditissimoq. Amico,  
& Condiscipulo

PETRO CASTELLIO  
MEDICO, ET PHILOS.  
ROMANO.

*Ioannes Manelphus Eretanus Sabinus sanitatem.*



NIMVERO verè dictum, quot homines tot sententiæ. Hinc Marsilius Cagnatus Medicinæ, & Philosophiæ Doctor eximius, tametsi in aph. concocta, doctissimam ediderit commentationem; nihilominus Prosper Marcianus Saxolensis ab eodem maxime dissentit. Actius Cletus Signinus, & ipse clarissimis rationibus Marsilij commentationem patrocinari fuimus. Tu verò Petre Ca-

stelle contraria nobis, & Præptori tuo opinatus es: nimirum, trahit sua quemque voluptas. atque hac tibi de causa facile ignosco: Neque idcirco læsum me existimo, quod nouæ sententiæ faber sis ( licet Condiscipulis tuis si humanius egisses, atq. vrbanius, ferendus magis videbare.) Æquidem æqui, boniq. consului verba tua, quamuis interdum aculeata. vtque alias conuenit inter nos, æquum est tu quoque, vt æqui, bonique consulas hanc meam responsionem Castelle: cum præsertim sententiarum dissensio, voluntarium consensionem, inter amicos non dirimat.

Conquereris igitur primo, in fol. 6. epistolæ, scripta tua de vomitatorijs, nec dum in lucem edita, Actij Cleti insignis Medici, atque meis disse, valde fuisse offensa: quando Melapodij nomine, quemadmodum Antycirei helle-

hellebore, nigrum intelligi, non autem album dicebamus. terque, quaterque, & pluries exclamas, nunc victum me, nunc labirinto Dædali implicitum, cæterisque huiusmodi nugis nobiscum nugaris. Postremò autem in fol. 8. eiusdem epist. tuæ, Ecce iam clarum videtur, concedis, helleborum nigrum vocari Melampodion, pro albo nullum, adhuc inquis legi testem. Si id igitur, quod & vniuersalis Medicorum Academia usurpauimus, quid Condiscipulos tuos frequentissimis vellicas dictarijs? Cur ergo cum Hipp: totaq. Græcorum Schola litem non suscipis, cur veteres Arabes, cur recentiores Latinos tuo isto bello non laceassis? fortasse quia nobiscum, tuisque studiorum charissimis Collegis iocari cupias mi Castelle! Eia igitur, ut utque tibi placuerit, enucleemus hanc, & alias helleborinas quæstiones.

Helleborum, inquit Plin. lib. 25. cap. 15. Itali veratrum vocauerunt, eo quod mentem vertat, vt Columella cum alijs attestatur. Græci verò helleborum dictitauere ex eo, quia cibum corporis eripiat. Dicitur etiam helleborum à Lusitano in Diosc. enarrat. 15. 1. & 15. 2. ab Helleboro fluuio propè Anticyram, vbi optimum reperitur.

Eiusdem hellebori duæ potissimum sunt species, album. scilicet, atque nigrum cum Plin. & album ex radice amplius enunciauere; quando cum nigri radice comparata candida sit etiam: Vnde Aul. Gell. 17. noct. Attic. cap. 15. Coloris discerniculum non in semine tantum, ait, neque in virgultis, sed in radice apparere.

Helleborum nigrum, vt legitur in Plin. ibidem, & neoterice, magisq. diffusè in Rhemberto Dodonæo Me-



chlinenſi lib. 2. Pempthadis 3. græcè  
ἡλίβορος μέλας, dicitur ; à nonnullis  
μελαμπόδιον, πολύρριζον, μελανόρριζον, περί-  
ποι, κυράνιον, ἀντικυράνιον, ἔκτομον ; ἑκοτομον.

Baptiſta etiam Codroncuſ in libello  
proprio de helleboro cap. 1. Hellebo-  
rum, inquit, nigrum aliqui vocaue-  
runt entemon, alij polyrrhizon à radi-  
cum multitudine, alij Euchymon à  
bonitate ſaporis. plerique verò Melā-  
podion dixere ab inuentore Melampo-  
de Vate, vt ſcribit Plin. lib. dicto. 25. c. 5  
vel à paſtore eiufdem nominis, qui cū  
animaduertiſſet eo purgari capras, fu-  
rentes in ſe Procti filias Elegem, & Cæ-  
lenem in Archadia prope fontem Cli-  
torium purgauit, & ſanitati reſtituit.  
Ex quo Melampus idem græcè καθαρίης  
purgator nimirum dictus conſequen-  
ter fuit : vel quia Procti filias luſtra-  
tionibus purgaſſet, vt tradit Seruius in  
interpretatione Virgiliani verſus lib. 3.  
Georg.

*Qua-*

*Quasitaque nocent artes, cessere magistri,*

*Phyllirides, Chyron, Amythaoniusque  
Melampus.*

Helleborum album nascitur in montibus frigidis, & asperis locis, ut optimi quique Authores tradunt. Cyrenaico primas tribuit Diosc. Oetæum verò, Ponticum, Eleaticum, & Massaloticum optima esse, & usitatissima: hisque & alijs omnibus Oetæum, & Antycirinum præferenda esse arbitrantur Theoph. & Oribasius. Galaticum, Cappadocium, Armenum, & alia quoque deteriora esse affirmantes: quod tamen in Italia nascitur non esse spernendum Brasauolus senior arbitratur, quamuis minus validum, quam alia experiatur ex Petri diuersi sententia.

Helleborum nigrum oritur in collibus siccis, & asperis, & ubique ferè locorum, inquit Plin. ibidem, cum Theo-  
ph.

phr. Probatissimum tamen, & optimū in Anticyra; quæ in Locide, seu Phocide est sita; in Helicone, Parnasso, & Aetolia prouenit cum Diosc. Vtriusq. hellebori tota radix eligi non debet, sed earum cortex carnosus tantum, & interior medulla abiicienda est, necnon tota radix capis persimilis.

Albi radices mensibus æstiuis colligendæ sunt; & in altissimis montibus ex Dioscor. Plin. & aliorum plurimum sententia, atque præsertim Syluij, Manardi; & Costæ in simpl. Mesue. Fuchsij de hist. plantarum, c. 104. Machelli in lib. de morbo Gallico, Duranti in suo Herbario, & aliorum similiū. Quamquā ex altera parte Theophr. lib. de hist. plant. 19. c. 11. tempestiuū Autumno, Vere autē intempestiuum dicat album helleborum. Vnde Vucccherius de rad. purg. Albi radices æstate, vel Autumno colligendas docuit.

Ea-

Earundem præterea albi veratri succisione radicum veteres, & capita aggrauari experti sunt auctore Theophrasto, & alijs: ideoque celeriter effundi, & allia præsumi, vinumque præforberi iisdem præcipiebant.

Nigri radices vere, vel Aestate cum Mesue excæpi debent, atque recenter Vucccherius de rad. purg. idem comprobat cum pluribus alijs: in quarum collectione superstitiosa antiquitas sub religionis specie obseruabat, vt primū gladio planta circumscriberetur (Plin. & Dioscor. ibidem etiam idem confirmant) deinde qui excisurus erat ortum folis expectaret, & præcaretur vt id liceret sibi permittentibus Dijs facere, obseruaretq; Aquilæ volatum, quæ seu potius Dæmon (vt doctissime inquit Codroncus) sub specie Aquilæ incidentibus interesse solebat: & si prope aduolaret, moriturum illo anno illum, qui  
suc-

succidebat augurium erat . Hoc etiam helleboro prisca illi domos suffiebant , ac lustrabant , seu purgabant se se aspergentes , & pecora cum præcatione solemni , & excantatione quadam .

Et denique cum Gal. lib. 6. Symp. Oribasio lib. 15. Collect. Aetio Tetrab. 1. ferm. 1. ac Paulo Aegineta , & alijs : helleborum vtrumque excalfacere , & exsiccare ordine tertio sciendum est : nigrum tamen gustu calidius , candidum verò subamarum . Mesue autem nigrum arbitratur calidum , & siccum esse ordine tertio : album calidum , & siccum in medio tertij : quod teste Diosc. vomitione varios humores ; crassos verò , ac viscidos authore Aetio , & secessu purgat , atrabiliarios etiam extrahere , & ichores , præter Brasauoli sententiam patet ex curatione eorum morborum , qui ab huiusmodi vitiosis succis fiunt . Quemadmodum hellebo-

borum nigrum purgat ventrem, inquit Diosc. in cap. proprio lib. 4. detrahit bilem, pituitaſq. datum per ſe: & ex Aetio niger atram, flauamq. bilem è corpore vniuerſo abſque multo labore per aluum ducit.

Cunctis his ex varijs Authoribus, optimiſque prælibatis, & compendioſè ſuppoſitis (qui plura exoptet, vetuſtos, ac nuperos conſulat ſtirpium ſcriptores) Melampodij nomine helleborum nigrum intelligi dicebamus docte Caſtelle, quoniam ex Hipp. id primo colligitur Medicorū parente, atque præſertim in epiſt. quadam ad Crateuam, vbi incerta eſt legitur, coniectura eorum, qui in purgationibus cautè procedunt: namque & ſtomachi ad ſiſtitionem veremur, καὶ ζυμωτικῶν φαρμάκων ad naturam ignotam coniectamus. Stabiliiores autem ſunt purgationes per veratrum, quibus etiam Melam-

lampus in Proeti filiabus; & Antyciræus in Hercule vñ esse narrantur. Ecce igitur stomachi afflictionem veretur Hipp. quæ ex albo nascitur helleboro, atque stabiliores purgationes laudat, quas nigro magis, quam albo comparari nemini dubium est. Vnde Melampodij nomine non album, sed nigrum intelligendum est. cum in Proeti filiabus, vel Hercule, eodem quoque Melampus vsus fuerit.

Secundo Theophr. 9. de hist. plant. cap. 11. nigrum verò, inquit, ab eo qui comperit, & primo succidit Melampodion quidam appellant, quo & domos lustrant quadam cum incantatione.

Dioscor. vt alibi diximus, docuit idem lib. 4. cap. 134. vt etiam Oribasius lib. 7. Collect. cap. 27. & alij.

Inter latinos eidem sententiæ suffragati sunt, Plin. lib. 25. cap. 5. nuperrimè

mè verò Manardus in Simpl. Mesue super cap. proprio hellebori. Gorræus in definitionibus medic. in verbo *μαλαμπόδιον*. Codroncus in lib. proprio de helleboro. Tagautius Vimacius de simpl. med. purg. facult. lib. 2. c. 3. Ioan. Langius epist. 74. vbi de Peonia, Scelopendria, & Selamoide. Amatus Lusitanus in Dioscor. lib. 4. enarrat. 151. 152. Hieronymus Mercurial. prælect. lib. 2. cap. 7. Ianus Antonius Saracenus Lugdun. in Scol. in Dioscor. Ioannes Ruelliùs lib. 3. de nat. stirpium cap. 139 Matthiol. cum de helleboro nigro. Histor. general. plantarum Catharticarum per Gulielmum Rouillium editam, lib. 16. cap. 6. quando *ἡλέβορος μέλας, μαλαμπόδιον, ἔκσμον, πολύρριζον, μελανόρριζον*, Latinè helleborus niger, inquit, veratrum nigrum, quibusdam Luparia, Arabicè Cherbachem seu Charbech, Afued. Italicè elleboro  
nero



nero, Gallicæ, ellebore noir. Et denique nullus reperiatur medicus, qui Melampodij nomine helleborum albū intelligat; contra verò nigrum esse omnes Melampodium interpretātur. Sed quid opus auctoritatibus, cum unica opinione tua contentus à cœteris omnibus Castelle dissentias?

Helleborum nigrum insuper Melampodij nomine intelligi affirmabamus ex dictione græca *μῆλα* quæ nigredinem significat. quæ verba nihil etiam facere Castelle fol. 8. eiusdē epistolæ tuæ inquis. Et nihilominus interpretatio nominis quæ Ciceroni notatio, etymologia græcis: inter primas sedes argumentorū enumeratur à Rhetoribus, & est cū Philosophis, ac Theologis, quam oratoribus, & Poetis frequentissima: non enim censendum, est temerè, at prudentissimè à maioribus nomina rerum fuisse imposita: præ

fertim verò cum nomina eadem ex plurium commixtione compacta veniunt, vt in Melampodio accidit. Vnde Ouid.

*A senibus nomen mite Senatus habet.*  
& illud .

*Aprilem memorant ab aperto tempore dictum.*

Quinctil. lib. 5. cap. de argumentis etymologiam inter partes definitionis collocauit, ibique locupletem à locorum, pecuniosum à pecorum copia dictum .

Cicero etiam in partitionibus oratorijs, in primis, inquit, commouet explicatio vocabuli, ac nominis, & in Topicis, multa etiam ex notatione sumuntur, ea est autem cum ex vi nominis argumentum elicitur, quam Græci etymologiam vocant; quia verba sunt rerum notæ; itaq. hoc idem Arist. symbolum appellat, quod latine est nota.

Neq;

Neque ex eadem dictione *μίλαν* discedentibus nobis *μελαγκρανίς* ex Gorrae lib. definit. med. species est palustris iuper fructum ferentis, in modum vuarum coherentium, in quibus cuspidatum semen clauditur, sic dicitur à nigro cacuminis colore. *μελαμυρλλον* dicitur *ὁ ἀκανθος*, authoribus Diosc. & Plin. nec dubium quin à nigro foliorum colore.

*μελαίθιον* gith frutex est exilibus surculis saepe binos dodrantes excedens, folijs ut senecionis, munitis, sed multo tenuioribus, capitulo in cacumine tenero, parvo, seu papaveris, oblongo, intercurrentibus intus membranis, quibus semen includitur nigrum.

*μελανπικρα* atramentum scilicet metallicum à nigredine etiam dicitur.

*μέλας* emplastrum quoddam nigrum est, inquit etiam idem Gorraeus ibid.

*μελαμπίλος* herba, alio nomine hel-

xine, quidam ex latinis vitem nigram  
appellant.

*μελάμπες* herba in segetibus nascēs  
teste Theophr. aliās miagros appellata  
latine sonat frumentum nigrum.

*μελανόληκος* qui nigra bile plurimū  
abundat præter omnes Medicos, &  
Phylosophos, id etiam Cicero docuit  
Thuliculan.

*μελάνκλης* Scythiæ populi nigris ve-  
stibus appellantur.

*μελαχρόρρις* avis, quæ & ficedula  
ab Athenæo dicitur lib. 2. diptosophi.  
cap. 26. quod *κοίφω* scilicet *μελίαν* id  
est verticem nigrum habeat, latine  
atricapillam cum Plin. lib. 37. cap. 8.

vocare possumus *ατρίβου* nomen  
*μελάνω* flos dicitur sub nigri coloris.

*μελάνωρος* piscis est laxatilis nigrican-  
tem habens caudam, de quo ille, haud  
facili parvus Melanurus fallitur arte.

Est præterea Melanurus apud Gæl.  
lib.

lib. 34. cap. 23. Serpentis genus præcipueq. in Lybia, & Arabia nascens, vipera minus, sed ad inferendam perniciem multo velocius. morfi ab eo siti torquentur, immodicequè bibentes sibi necem inferunt. Cauda lineis duabus nigris distinguitur, vnde & nomen accepit corpore reliquo albicante.

*μύρας* insuper nomen est fluuij in Beotia præsertim existens, cuius aquas oues nigras efficere scribit Plin. lib. 2. cap. 130.

*μηλὰμπος* Amithaonis Argiui, & Doripes filius teste Homero ad lib. 15. Odiss. vel filia Abantis Idothea natus, vt inquit Angelus Polit. in suis miscell. cap. 1. Melampus inquam nomen accepisse fertur, quod mater infantem exposuerat toto corpore tectum, præter quam pedibus, qui à sole atro colore attracto nomini causam dederunt,

ex *μίλαν* scilicet, quod nigredinem, &  
*πὺς*, quod pedem significat: Melam-  
 pus nimirum, virum pedibus nigrum  
 sonabat Græcis. Cum autem & vera-  
 trum nigrum, nigris pedibus, siue ra-  
 dicibus existat, vnde superioribus *μι-  
 λανόρριζον* etiam dictitabatur: cur igitur  
 nomine Melampodij nigrum hellebo-  
 rum non intelligatur? Cum præterea  
 dictio *μίλας* antonomastice Hipp. ve-  
 ratrum nigrum significet. vt colligere  
 est in lib. de rat. victus in morb. acutis.  
 pag. 56. vers. 6. *μίλαν*, videlicet, *μὲν δαυ-  
 κον, ἢ σέσλι, ἢ κύμινον, ἢ ἀλλὸ τὸ τῆς ὀσμῆς  
 μίσχοντα*. Veratro quidem nigro dau-  
 cum, aut fœfeli, aut cuminum, aut  
 aliud quid boni odoris admiscebis. Et  
 vers. 8. ibidem *ἄλλ' δὲ μίλας μὲν καλλίω δὲ  
 κρισμῶτερα πεπλῖν. πέπλιον δὲ μελάνος μαλ-  
 λον φυσίων καταρρήκτικώτερον ὅς' ἐστιν*. Veratrū  
 autem nigrum tum melius, tum ad  
 iudicationem accommodatius, quam  
 pe-

peplium ventrem soluit . Peplium vero nigro veratro melius flatus educit , perrumpere facit .

Audio Castellum ad hæc respondere , Melampodion plantam , haud expedum , vel radicum nigredine , sed Melampodij viri dictione propria denominationem sortiri , Melampodion , scilicet herba qua Melampus vir nomine dictus utebatur : Melampus autem ex sua pedum nigredine denominabatur , vt modò probabamus .

Profectò nigrum veratrum cum suis radicibus nigris , quemadmodum & aliarum plantarum maiorem partē , ex prima vniuersi constitutione realiter fuisse , nemini dubium esse mihi persuadeo .

At Melampum ex suis nigrefactis à sole pedibus appellatum , Poeticam potius fabellam dixerim , quam historiā .

Probus certè Maronis interpres hæc

fabulam Apollodoro tribuit, Politiano ibidem referente. Vnde Melāpus haud ex sua pedū nigredine, sed ex hellebori nigri colore potius nomen, vel pronome accepit. Proprie igitur, & oppositè Melampodion ex voce *μίλας*, quæ nigrum sonat, nigrum helleborum interpretamur. Atque *μίλας* ad Melampodij, vel hellebori nigri dictionem significandam, nihil facere dicendum non erat, perdocte, diligens, & oculate Castelle.

Melampus itaque vel fuerit pastor cum Dioscoride, & Plinio: aut vates quemadmodum Plin. ibidem lib. 25. cap. 5 dicto. cui assentitur Atheniensis Apoll. in sua bibliotheca cum cæteris ferè omnibus: atque præsertim cum Porphyrio lib. 3. qui etiam illum brutorum sermonem probè nouisse, & intellexisse scribit: veluti Synesius in lib. de insomnijs illius tamquam somniorum



rum interpretis doctissimè meminit  
atque Pausanias de eodem in Corin-  
thiacis scribit, Eustachius, & ante hos  
Diodorus lib. 5. & alij. Vel denique pa-  
stor, & vates simul fuerit idem Me-  
lampus, vt etiam non nemini placuit  
(quando cum Varrone lib. rerum ru-  
sticarum 2. cap. 1. de Antiquis illustris-  
simus quisque pastor erat) Vt cumque  
demum fuerit, Proeti filias, & Hercu-  
lem nigro helleboro, non autem albo  
Melampum curasse optimo iure asse-  
rabamus.

Atque, vt paulo altiùs orationem re-  
dordiar, hoc primò docuit Hippocr. in  
epist. superius allata. In eandem sen-  
tentiam conspirarunt ferè omnes ij  
Medici, qui Melampodij nomine ni-  
grum significarunt. Et deniquè tu ipse  
mi Castelle volens nolens Condiscipu-  
lorum tuorum dictis subscripsisti. In  
folio inquam octauo epistolæ tuæ ita  
item

item loquens. Quando autem, in infanis vtendum albo, quando verò nigro: fidus optimusque Hipp. interpres Celsus lib. 3. cap. 18. clarè docuit. Infanientibus nimirum si tristes, nigrum helleborum deiectionis gratià: si hilares erint, album ad vomitum excitandū dari debet. Sed sic est Præti filias, & Herculem tristitia infanas fuisse, haud cum hylaritate. Ergò nigro helleboro, non albo fuisse curatas fatendum est.

Quamquam etenim, vt bene docuit Cœl. Aurel. Siccensis lib. 1. Chronicô. cap. 5. furor nunc iracundia, nunc hilaritate, nunc mœlitudine, siue vanitate occupet mentem; nunc timore comitante inanium rerum, sicut quidam memorauerunt, vt nunc speluncas, nunc lacunas, ne in easdem concidant, vel alia quæ terrori esse possunt; Nihilominus Præti filias, quando Vac-

cās

cas se esse putabant , neque alia erat ipsarum infania , cum tristitia infans fuisse , certissima res est .

Etenim Lynceus , siue Linus post Danaum patrum Argiuis regnavit , suscepitque Abatem , Iasium , & Acrisium filios . Abas vir ingenio , & bello potens patri in Regno successit , Primumque , vel Proetum genuit . Proeto Stenoboe coniux fuit , siue Antiope ex Homero , ex qua insuper tres filias habuit : nempe Lisippen , Iphinoem , & Iphianassam , cum Apollodoro in bibliotheca ; vel Ælium penes in omnifaria historia Elegen , & Celenen , & ut alij addunt Moerā , Euriden , siue Eurialē . Hę pulchritudine elatę filię , cū se Iunoni pręferre ausę fuissent , ab eadē furiosę redditę sunt , adeo ut Vaccas , deinde , se esse putarēt , perq. sylvas mugientes errarent . Vnde Virg. in Sileno.

*Prætides implerūt falsis mugitibus agros.*

Præ-

Prætus pater, vt filiæ suæ furorem  
 euaderent, cuiuscumque, qui easdem sa-  
 naret, vnā quam mallet coniugem;  
 Regniq; partem sponndit. Quare  
 Melampus Amythaonis filius, easdem,  
 vt plurimi grauissimi sentiunt Autho-  
 res, helleboro sanauit. Vnde ex Dio-  
 scoride Prætion quoque eadem herba  
 in posterum appellata est. Tamen si re-  
 centior author Boccaccius lib. 2. de Ge-  
 neologia Deorum cap. 28. 29. 30. eas-  
 dem referat. Prætidās apud Clitorem  
 Archadiæ Urbem à Melampo fuisse  
 deductas, vbi è spelunca quadam pro-  
 fluit aqua, quæ bibentes abstēmiōs fa-  
 cit. Concinit Ouid. 15. Metamorphi:

*Clitorio quicumque sitim de fonte le-*

*uaxit,*

*Vina fugit gaudetque mæris abstēmius*

*undis*

*Seu vis est in aqua calido contraria*

*vino,*

*Sive*

Siue, quod indigene memorant, Amy-  
 thone natus.

Prætidæ ætonitæ postquam per car-  
 nificem, et herbas

Eripuit furys, purgamina mētis in illas  
 Misit aquas, odiumque meri perman-  
 sit in undis.

Sextus Empiricus Pyrrhōniorum 4.

Polyanthum Cyrenæum dicere testa-  
 tur in lib. de Asclepiadarum genitura,  
 Proeti filias ab Æsculapio fuisse ab insa-  
 nia liberatas, in quam Iunone irata in-  
 cidissent.

Quomodocumque autem Proeti fi-  
 liæ sanatae fuerint: se Vaccas putasse  
 neuiquam fabulosum videri debet, in-  
 quit Politianus in suis miscell. cap. 30.  
 Siquidē Paul Aegineta Medicus Græ-  
 cus Author in 3. periodeutico de atra-  
 bile, deq. insania ipsa agens, vsu quo-  
 que venire ait yti quidam sibi brutæ  
 animantes esse, vocesque imitari illa-  
 rum

rum videantur. Prætereaq. nonnullos arbitrari se vasa esse testacea factos, cum autem ob id metuere ne confringantur. Coel. etiam Aurel. lib. 1. chronicon. cap. 5. furens, inquit, alius se passerem existimauit, alius laterem, alius Deum, alius Oratorem, alius Tragedum, vel Comædum, alius stipulam, ferens mundi se certum tenere, alius se sustentandum manu poscebat, vagiens vt infans. Sed de his casibus, maxima sylua est apud varios authores: atque præsertim in ordine ad melancholicos, legenda sunt huiusmodi apud Gal. lib. 3. cap. 6. de locis affectis. apud Aetium Tetrab. 2. sem. 2. cap. 9. Apud Alex. Trall. lib. 1. cap. 17. Atque nuper in me apud Schenchiū lib. 1. obseruat. med. 253. Quidquid inquam de huiusmodi sit: Infanas Proeti filias, quando vacas se esse putabant, haud cum hilaritate, sed tristitia fuisse con-

firmandum est. Cum etiam Vaccæ ipsa sui specie, ac forma tristes prospicientibus appareât, atque insuper, motu tarda sint animalia, necnon etiam alimento crasso, & potius melancholico sint, apud omnes Medicos. Indicia certè omnia quæ non hylaritate, sed cum tristitia laborasse arguunt insanas Procti filias. Ergò etiam nigro helleboro, non autem albo fuisse curatas à Melampode affirmandum est.

Hercules præterea, fabulâibus Poetis, cum apud inferos Mægeram vidisset, in furem versus est: vnde regressus filios imprudens occidit, Seneca in Tragœd. referente. Ex quo Lucanus lib. 1.

*Aut qualem iussu Iunonis iniquæ  
Horruit Alcides, viso iam Dite,  
Megeram.*

Arist. sect. 30. probl. subiiciens exempla Heroum, qui atra bile laborasse di-

cun-

cuntur, in primis de Hercule agit, ea ipsa inquiring hic natura fuisse putatur: & morbum comitalem sacrum ab illo & Herculeum prisci nominauere, & in liberos suos pauor, vel mentis excessus (benè sanè vertit Polit. in miscell. c. 90. & eruptio vlcerum ante mortem ipsius in Oeta. id enim plerisque atra bile cōsistit. Atrabiliarius igitur Hercules erat, & proinde tristis etiam, nequaquam, verò hylaris. quemadmodū antiquissima eiusdem simulachra, quæ infinita hic Romæ visuntur, etiam demonstrant.

Sed audiamus in hac re plures Doctores cum Gal. in lib. de atra bile. Videmus enim, inquiunt, etiam extra corpus nihil nobis ita horrendum, veluti sunt tenebræ. cum igitur velut caligo quædam rationali animæ circumfusa fuerit, necesse est timere hominē, vt qui causam timoris secum in corpo-



re circumferat . Sicuti amplius refert Schenchiùs , quem supra retulimus , in profundis tenebris pueri timent , itemq; adulti imperiti : ita etiam atræ bilis color velut tenebræ rationis locum obumbrans timores efficit .

Quid ergò , albo nè , an verò nigro Herculé fanatum ab Anticyræo dicendum ? Sanè , cum timore tanquam atrabiliarius , cum etiam tristitiæ obnoxius , & opportunus esset , vt ex alijs probabamus , nigro asserendum est ; quandò aliàs affirmando præpostere Anticyræum egisse sequeretur : quod ex euentu & eiusdem Herculis consequuta valetudine , nèquaquam dici valeat . Vnde nigro helleboro fanatum Herculem etiam , atque etiam & sentiendum , & prædicandum est . Subijciendo his amplius , appositum in re nostrâ grauissimi Authoris Celsi præstantissimi Medici oraculum , qui lib. 2

cap. 12. veratrum nigrum, inquit, vel atra bile vexatis, aut cum tristitia infamieñtibus, aut ijs quorum nervi parte aliqua resoluti sunt, datur.

I nunc, & prædictis cum rationibus cum etiam Doctorum consensione, victorem te prædica profligate Castelle. I, atque de Anazarbæo milite (hoc enim nomine Dioscoridem cõtemnere videris) voce tenus triumphâ. In fol. nimirum 9. eiusdem epist. tuæ. Ex his constat, inquis, Dioscoridem in Poetarum, & Hystoricorum libris fortè parum versatum æquiuvocasse de Melampodij nomine: & alibi victû Dioscoridem dictitas. Bona cum tua venia dixerim emice mi, atque amantissime Condiscipule, de magnis viris bene semper loquendum est, optimaq. cum reuerentia. Vir fuit Dioscorides in re herbaria nemini secundus. vnde for-  
asse Dioscorides à Dioscuro Sedoch  
filio,

filio, qui vires herbarum ad medicinæ opportunitatem, vsumque inuenit, dictus est, vt sentit Sanchoniaton Berutius à Philone Biblio translatus.

Audi etiam Galenum de hoc magno viro quàm bene loquatur: sexto nimirum de Simpl. med. facult. Dioscorides Anazarbæus quinque libris vtilem omnem materiam medicam, absoluit. nec herbarum modò, sed & arborum, fructuum, succorum, atque liquorum meminit, insuperq. metallicorum omnium, & partium animalium. Et mihi quidem omnium perfectissimè videtur medicamentorum materiam tractasse. & si enim qui illum antecessere, de ijs bene scripsisse reperiuntur, nemo tamen omnium æquè de omnibus.

Et quarto de med. comp. secundum genera hæc habet. Dioscoridem medicinalis materiæ scriptorem, nulli eorum

rum qui in ea quasi arena defudarunt  
secundum esse quisquam dixerit .

In priore præterea de antidotis libro . Quæ nam quacumque in regione  
medicamenta optima proueniant, cum  
Dioscor. tum & alij verè scipsierunt .

Ibidem, de omni medica materia  
Dioscor. quinque libris satis superque  
scripsit, à quo tum alia disces, tum &  
notas gustu, obfactuq. perceptas, quibus  
probatoria medicamenta certissimè  
cognosci, & ab improbatis discerni  
queant . In quibusdam verò & perceptas  
oculis qualitates reperiās, quæ  
haud parum vtilitatis afferunt .

Sed cur omisimus locupletissimum  
testem Suidam ? Dioscorides inquit ille,  
Anazarbæus Medicus, cognomento  
Phacas, quasi lentiginosus, à lentiginibus  
ita dictus, quibus illius facies de-  
honestabatur, Vixit cum Cleopatra,  
Antonij temporibus, scripsit libros medicos

dicos vigintiquatuor ; qui quidem magnopère celebrantur . Cunctos deniq. Medicinæ si consulamus Doctores in Dioscoridis laudes profusi sunt , tu tamen vnus eundem irridere etiam , atq; etiam Castelle ausus es .

Tutela, & patrocínio opinionis tuę, ideò quidem dicis Præti filias albo helleboro curatas , quoniam & idem Gal. docuit in lib. de atra bile . Date manus insuper, herbã porrigite victori inquis, Gal. æquiualeat an superatur à Dioscor.

Sanè verba Gal. vt tu ipse legit interpretes Bartholomæus Syluanus. Quãquam scilicet , priores eo non solum Philosophi & Medici , sed omnes vulgò affectum quendam melancholicum vocant: purgationeq. albi hellebori aggre-  
diuntur . Nemo enim inter Græcos enutritus , ita est ruditer institutus, qui non legerit, vel audierit Præti filias furore percitas à Melampode sic purga-

tas fuisse . In margine verò , hellebori nigri fortasse legendum, ibidem adnotatur . Non igitur nos ipsi tantummodò , verum etiam alij, ijque grauissimi Authores Præti filias nigro helleboro sanatas affirmarunt: & Gal. verba notariorum incuria deprauata fuisse existimant .

Secundo Galenum tametsi idem loquutum fuisse dicamus , proculdubio cum Dioscorides contrarium edocuerit, maior est Dioscoridi habenda fides in hac re , quam Galeno, cum ex argumentis supra allatis , tum etiam quia Dioscorides Gal. antiquior longè fuit .

Quod verò Theophrastus lib. 9. de hist. plantarum cap. 11. nigrum helleborum dicat æquos , boues , suesq. necare affirmant , idcirco eum cauere ; candidoq. pecudes nimirum velci, atq. hinc primo vim deprehensam , cū illo pecudes purgarentur , nihil facit con-

tra nos : cum non ex se , suaq. sententia loquatur, sed affirmant, inquit ibidem, Theophrastus : quo eodem loquendi modo ; & Plin. etiam in hanc rem vtitur . Non enim huius sententiæ erat fortasse Theophrastus , quando in eodem lib. de hist. plantarum cap. 15. ex animi sui sententia pronuncians , huiuscemodi verbis vtatur . Et quidem Archades pro medicamento , quod aluum purget , lac sorbere consueuerunt in Vere : cum succi huiusmodi foliorũ maximè vigent : tunc enim potissimũ lac vim medicaminis habet . Bibũt bubulũ ; quod bos inter animalia omnia permulta pascere , varioq. herbarũ genere vesci videtur . nascitur apud eos vterque helleborus, videlicet , & albus, & niger . An igitur in hac regione , lac bouum ideo purget , quandoquidẽ , & vtroque helleboro vescantur , neque ab eodem hic interficiantur boues ?

Secundò licet vera sint, quæ Theophrast. refert, helleborum videlicet æquos, boues, luesq. necare; non illud sequitur vt ab eodem interficiantur capræ: cum interdum quod alteri nocet, alteri profit. sic sturni cicuta vescuntur, asini verò interficiuntur. Concinit Lucretius à te citatus.

*Præterea nobis veratrum est acre venenum,*

*At capris adipēs, & coturnicibus auget.*

*Quippe videre licet pinguescere sæpè cicuta*

*Barbigeras pecudes, homini quæ est acre venenum.*

Ideò autem nigro veratro capras interfici forsan existimas, quoniam vt apud eundem Theophrastum est, pecudes albo vescuntur, purganturque, sub nomine autem pecoris cum Varone lib. 2. de re rustica, plurà animalia



lia continentur. pecora, nimirum, maiora, vel minora sunt. ad minoraque, sues, oues, & capræ reuocantur. Proinde si pecora, quo etiam capræ nomine censentur, helleboro albo purgantur: ergò idem & de capris affirmandum est. Cumque amplius Melampodion, siue helleborum nigrum à pastore eiusdem nominis appellari dicitur, qui capras purgari pasto illo animaduertens, datoque lacte earum, & Proctidas furentes deinde sanauit: falsum asseri ex Dioscor. ais Castelle.

In qua re animaduertendum primò erat Procti filias lacte pecorum, siue caprarum purgatas à Melampo fuisse, Dioscoridem nequaquam dixisse, ut certissimum à te ponitur. Helleborum nigrum, & hæc sunt Dioscoridis verba in lib. 4. cap. 13 4. appellatur Melampodion, quoniam caprarum pastor nomine Melampus furentes in se Proctidas pri-

primus purgasse, & sanasse fertur. Fortasse dicet aliquis, non lacte caprarum, sed proprio ipso helleboro Proetidas purgauit, ex Dioscoride, Melampus, Plin. quidem est, qui illud retulit, vbi sic ait. Aliqui pastorem eodem nomine inuenisse tradunt, capras purgari pasto illo animaduertentem: datoq. lacte earum sanasse Proetidas furentes.

Deinde quid obstat dicere, & albo; & nigro purgari capras: Experiundi gratia vtrumque exhibitum fuit à peritissimis Medicis, & à neutro mortē, sed purgationem receperunt caprae.

Ad hoc autem experimentum respondetur fortasse, helleborum illud verum non fuisse, cum Medicos inter Doctores ambiguitas non parua sit circa veri hellebori cognitionem, vt vnusquisque in historia vniuersali plantarū per Gulielmum Rouilliū editam perlegere poterit. nec non apud Leonardum

dum Fucium in lib. de nat. stirpium, cap. 105. apud Vueccherium in Antidotario, apud Langium in epist. 74. & alios quamplurimos Authores, quos omnes breuitatis causa in præsentì omittimus. At verò helleborum illud fuisse verum, ex subsequuta cominoda purgatione cognoscitur.

Vt autem ad quæstionem nostram redeamus, stabiliores, inquit Hipp. purgationes sunt per veratrum, quibus Melampus in Proëti filiabus, & Anticiræus in Hercule vñ esse narrantur. Sed purgationes per nigrum helleborū tutiores sunt, quam per album, vt Mesue cum pluribus alijs edocuit. Ergo nigro, non albo helleboro, Proëtides, & Hercules curati fuere.

Quamquam ex altera parte nonnullos asseuerare scio, tutiorem fieri purgationem per album, quam nigrum; cuiusmodi inter cæteros nuperrimè

Petrus saluis fuit lib. de affect. particularibus cap. 19. cum de rabie. itemque Matthiolus Senensis: Verum, vt perbenè Lusitanus enarrat 151. 152. in Dioscor. loquitur, huiuscemodi quæstionē diluendo, non aliundè, inquit, diuersitas hæc exoritur, quam ex regionum diuersitate (Accessit etiam huic sententiæ Costæus in Mesue.) vna enim in regione albus potentior nigro est, in alia verò niger albo. Plures autem, subdit, nouimus herbas, quæ vno in loco suas exactè seruant naturas, alibi verò ab illis degenerarunt, vt in cicuta videre est: quinimmò in animalibus quoquè id euenire certi sumus, vt de serpentibus de araneis, & alijs varijs animalculis, quæ in regionibus frigidis venenosa non sunt, alibi verò veneno non carent. At vero plures sunt, qui purgationem ex nigro tutiorem affirmant, quam qui ex albo. Vndè Plin.

refe-

referente ibidem, Herophilus helleborum album fortissimi Ducis similitudini æquabat. Senibus, & pueris eum eodem Plin. album dari vetant; itemq. mollis, ac foeminei corporis, animiue exilibus, aut teneris, & foeminis minus quam viris, vel timidis. Ista verò de nigro haud affirmat Plin.

Manardus in Mesue quamquam exercitatissimus vir: ego inquit nunquam albo usus sum veratro.

Vueccherius cap. 11. lib. 4. Antidotarij generalis; veratro albo nigrum succedaneum est, quodq. radicibus constat nigris, tenuibus, quarum dumtaxat est usus.

Helleborus albus, in Fernelio legitur lib. 5. meth. cap. 10. vomitione purgat, sed maxima corporis perturbatione, & præfocationis metu ex qualitate venenata. Et lib. de abditis rerum caussis cap. 2. helleborum homini pestife-

stiferum, quamquam coturnices vescantur.

Petronius in lib. de sanitate tuenda cap. 13. Helleborum album sine metu præberi nequit.

Mercurialis ad Auerroem lib. 1. de affectib. cap. 25. Helleborum album, inquit, conuulsiones facit, nigrum vero nequaquam.

Helleborū nigrū est innocens medicamentū, modò ritè paretur, inquit, Eurnius lib. 2. meth. ad praxim c. 24. & cap. 21. non sine summa cautione albo helleboro utemur. Atque in lib. 2. de vict. rat. in morb. acut. text. 21. ab eodem Eurnio hæc habentur. Helleborus albus maxima parit sympthomata, conuulsiones, lipothimias, hypercatharſes, adeò vt multi inconsideratè eo vtentes moriantur. hoc sæculo eius vsus suspectus est: quia ab eo plurimi in conuulsionem inciderunt. niger vero

rò innocens est . Vnde Andreas Tenzelius in exegeſi chymiatrica parte 2. hellebori extractum peragens ex nigro facit non albo . quoniam cum Angelo Sala Vincentino Veneto in lib. hermetologia inſcripto, huiusmodi pharmacû robori vitali maximam ſecurim iniicit .

Et denique cunctis omiſſis aliorum Doctorum testimonijs , Auërroes , & Arabes communiter , quos vniuerſalis ferè Medicorum Schola ad præſens ſequitur , album relinquentes , tantummodò nigrum propinant . atque id bonum , & ſalubre fuiſſe , experientia quoque magiſtra docent . ſed huiusmodi quæſtio alium repoſcit locum , altiorẽque indaginem .

Neque obſtat amplius quod ridentẽ Democritum curaturus eſſet Hipp. Quamquam enim idem Hipp. ad Damagetum in epiſt. ex admonitu Abderi-

deritarum Democritum ipsum ridere referat, his verbis; Ridet, inquiunt semper, & ridere non cessat in omnibus negotijs: risus ille nihilominus, haud ex hilaritate, sed tristitia exoriebatur, atque ex contemptu rerum omnium. Vnde in altera epistola Abderitarum, etenim legitur, oblitus Democritus omnium, & primum sui ipsius, vigilans & noctu, & interdiu, & singula parua, ac magna deridens, & totam vitam nihil esse putans vitam transigit.

In epistola ad Philopœmenen, veniemus autem, loquebatur Hipp. bona fortuna, & meliore spe, velut arbitramur accedemus, prout in literis est traditum. cum non insaniam, sed quãdam excellentem mentis sanitatem vir ille declaret, dum neque liberorum, neque vxoris, neque cognatorum, neque rei familiaris, neque omnino alicuius



cuius curam gerit. Sed & diu, & noctu apud se ipsum cunfistit, & priuatim vitam degit, plerumque in antris, & solitudinibus, aut sub arborum vmbreis, aut in mollibus herbis, aut apud frequentia aquarum fluentia. Contingunt igitur talia plerumque atra bile percitis: Taciturni enim aliquandò sunt, & solitarij, ac deserti amantes, & rerum familiarium conspectum auersantur, alienum putantes. Ex his omnibus colligere licet Hippocratem petijisse illud à Crateua helleborum, detulisseque ad Democritum, quod atra bile affectis, ac tristibus congruum erat. atqui hoc cum Celso superioribus nigrum est. Ergò nigrum helleborum ridenti, deridentique Democrito etiam detulit.

Ad hæc, idem Hipp. non ignorabat qua ætate esset Democritus, nempe senem esse eo temporis, vt ex Diogene, in ipsius vita colligitur, atque senibus,

D & pue-

& pueris. & debilioribus non conuenire album helleborum antiqui pariter pronunciauerunt, cum Plin. paulò superius citato. Præterea tanquam rerum omnium scientissimus optimè etiam callebat Hipp. affectum atrabiliarium esse Heroum pathos cum Homero. Vnde Arist. probl. eadem sect. 30. Cur homines, inquit, qui ingenio claruerunt, vel in studijs philosophiæ, vel in Republica administranda, vel in carmine pangendo, vel in artibus exercendis, melancholicos homines fuisse videamus: & alios ita vt etiam atræ bilis vitijs infestarentur? Ceu inter Heroes Hercules fuit: Lyfander Lacedæmon, Ajax, Bellerophon, Empedocles, Socrates, Plato, cœterique similes. Profectò ex loci descriptione, vbi Democritus ad speculandum secesserat: namque sub patula, & humillima platano sedebat (Hipp. Damageto in epist. refe-

referente) in veste crassa citra humeros  
desinente, solus, discalceatus etiam, su-  
per lapidea sede, valde pallidus, ac ma-  
cilentus, promissa barba: accumulata  
etiam plura animalia iuxta ipsum erant  
per totum resecta. Ex his, inquam, &  
alijs, Democritum haud hylarem ta-  
met si rideret, sed tristitia potius con-  
flictatum asserere necesse est.

Et hæc sunt, quæ nobis probarunt,  
cum Præti filias, tum etiam Herculem,  
nigro helleboro, non albo fuisse sana-  
tas. In reliquis cum Ioanne Langio in  
epist. 74. supra in testimonium prudi-  
ta: Quam vellem ut Gerardus qui præ-  
teritis annis noui orbis insulas perlu-  
strauit, in Anticyram quoque hellebo-  
ro salubriori fœcundam nauigasset, aut  
Appionem Grammaticum, Pythago-  
rica palingenese reuiuiscere (qui um-  
bras Homeri, ad percunctandum qua  
patria, quibusue parentibus natus fer-

tur euocasse) vt nobis quoque manes  
pastoris, & Vatis Melampodis ab infe-  
ris accerferet, quo te Petre Castelle  
certiorem redderet quali helleboro, aut  
Sesamoide, an horum fructu, vel radi-  
ce furentes Proeti filias in Archadia,  
apud fontem Clitorium curasset. Vel  
Hoea mulier ex Orco remearet, Anti-  
cyræ exin dicta, cum Athenæo in di-  
pnosoph. cap. 19. quoniam, scilicet,  
Nicostratus Medicus eius vir multam  
hellebori quãtitatem cum moriẽs reli-  
quisset; fortasse declararet pariter qua-  
lis esset Anticyræi helleborus, à quo  
nomen, vel potius pronomen ipsa de-  
sumpsit. Atque ita profligata omnis  
quæstio esset.

Tertio tuos mi Castelle amicos, &  
Condiscipulos accusas, qui obiter, &  
potius dubitanter, quam aliàs, helle-  
bori nomine simpliciter dicto, vtrum-  
ue significari apud Hipp. affirmaba-  
mus

mus, non autem album solummodò;  
atque huiuscemodi erant verba mea in  
fol. 26. ad adnotationes Prosperi Maria-  
ni Saxolensis. Occasione eiusdem di-  
ctionis *φάρμακόν*, asseruit præterea  
Martianus helleborum simpliciter di-  
ctum semper, & quodcumque apud  
Hipp. album significare. Et quidem  
ante ipsum fuit hæc Gal. quoque opi-  
nio 5. aph. 1. & alibi. Quamquam  
ex altera parte eundem apud Hippocr.  
multa sint, quæ huiuscemodi propo-  
sitionem in dubium reuocent: & sic lo-  
ca de insomnijs in ordine ad insanien-  
tes adduxi: de fracturis: primi, & se-  
cundi de morb. mul. etiam atque etiã  
à te minus æquè reprehensa.

Quoniam, videlicet, huiuscemodi  
quæstionem apud omnes Doctores ne-  
quaquam percepisti, simplici hellebo-  
ri appellatione, semper album intelli-  
gendum esse in epistola affirmas. Quin-

imò quod in homine herbariam scientiam profitente mirabilius est, in ipso epistolæ titulo hæc habes: Epistola in qua nomine hellebori simpliciter prolato, tum apud Hipp. cum alios Authores, intelligendum esse album, declaratur. Si cum plurimis Græcorum id saltem asseruisses, profectò excusatione aliqua dignus esses. quando in hanc sententiam, ex nuperis, Codroncus in proprio libro deflexit: Iacobus Syluius quando simpl. absol. scripto quid accipiendum docet. Ioannes Eurnius lib. 4. aph. Hipp. 13. Vbi Græci per helleborum, inquit, album intelligūt: Arabes verò nigrum. Duræus in Coacis agens de dorsi lumborumque affect. tex. 6. num. 7. cart. 192. Historia plantarum vniuersalis superioribus adducta: pluresq. alij; Cuiusmodi Paul. Græcus Author & Med. lib. 7. cap. 4. sub nomine veratri album intelligere vide-

videtur : nec non etiam Arætæus Cap-  
padox lib. 7. cap. de melancholia . Ta-  
metfi ex Græcis aduersari videatur  
Theophr. lib. 4. de hist. plantarũ cap. 6

Quidquid autem de Græcis Autho-  
ribus sit , apud omnes simplici appel-  
latione hellebori album intelligi , qui-  
cumque dicit , is profectò multos nec  
legit , nec vidit Authores : atque præ-  
sertim Arabes nomine hellebori, & an-  
tonomasticè , semper nigrum intelli-  
gentes; vt Codroncus iam iam allatus,  
Eurnius ibidem , omnesque ferè alij in  
hac re conueniunt .

Latini circa hellebori appellationẽ  
uarij sunt : atque præsertim ex recen-  
tioribus aliqui nigrum, aliqui album,  
& nonnulli denique vtrumq. assumunt  
prout nimirum Græcis , alij verò Ara-  
bibus magis addicti sunt . Æmilius  
Macer de herbis agens sic cecinit .

Helleborum geminas species testa-

tur habere. Albū quod sursum purgat  
nigrumq. deorsum. Vim siccam, ca-  
lidamque tenet: & tertius illis. Est in  
vtroque gradus. Ergò hellebori appel-  
latione simpliciter, haut semper albū,  
sed quandoque nigrum, interdum ve-  
rò vtrumque intelligitur.

Hellebororum insuper appellatio-  
nes, Ideò quidem diuersas fuisse ego di-  
cerem: quoniam diuersis temporibus,  
vel vnum, vel alterū apud homines in  
vsu magis fuit. Vnde Gal. tēpore, atque  
per ducentos ante, vel trecentos, & am-  
plius annos; quoniam purgatio per al-  
bū helleborum celeberrima permāsit,  
vt idem confirmat ipse Gal. lib. de atra-  
bile cap. 7. quemadmodum in posterū  
Pauli tempore, & aliorum fortasse: pro-  
pterea antonomastice, vel simpliciter  
nomine hellebori prolato album intel-  
ligebant. Contrà autem Arabum tem-  
pore, quandoquidem relicto albo pro-  
pter



pter pericula , in quibus versabantur ,  
quicumque ipsum accipiebant, & so-  
lo nigro tanquam tutissimo utebantur:  
nomine hellebori simpliciter enuncia-  
to , nigrum significabant . Et sic etiam  
pleræq. Academiæ , quandocumq.  
helleborum dicunt in suis compositio-  
nibus , nigrum usurpant . Inter quas ,  
exempli gratia , nobilissimum Archia-  
throrum Romanorum Collegium in  
suo doctissimè dispositio Antidotario ,  
hellebori nomine in comp. pill. Coc-  
chiarum , nigrum assumit . Et hoc so-  
lum Collegij testimonium sufficere ti-  
bi debuisset Castelle , vt intelligeres  
haud semper album , sed nigrum quã-  
doque simplici hellebori nomine usur-  
pari . Quamquam miraculum id qui-  
dem mihi non est, cum in tua disputa-  
tiuncula de duratione Medicamentò-  
rum , aduersus Collegium tuũ ex pro-  
fesso etiam te scripsisse non ignorem .

In

In qua re , faltem immemorem te noluiſſem , ab eodem Nobiliſſimo Collegio Doctoratus Laurea te fuiſſe exornatum. Aduerſus Romanorū Medicorum Collegium nihil dicere , neque patrare , iureiurando te fidem obſtrixiſſe tuam. Et denique in eiufdem Collegij ſedibus nonnullos reperiri , à quibus medicinæ ſcientiam perceperis : Archiatroſq. illos adeò doctos , adeòq. eruditos eſſe , vt eorum authoritatem , atque doctrinam humaniori ſcriptione reuereri debueras . Sed de his hactenus .

Hippocratis temporibus vtrumque helleborum in vſu erat : Vnde Amatus Luſitanus in Dioſc. locis dictis, Albi, & nigri radices , inquit , in vſu medico frequenter veniunt . quibus Priſci indifcriminatim utebantur , non plus albi radices , quam nigri ægrotis dando. Sed albi potius pro euocando vomitu , nigri

verò

verò pro aluo subducenda. At recentiores, & Medici ab hinc trecentis annis nigrum exhibent helleborum albū tanquā venenum formidantes, vt Mesue in suis simpl. dicat: Albus corporibus nostri temporis molestus, imò est eis sicut venenum propriè præfocans. nigri autem vsque ad tempora nostra virtus tolerabilis est, licet adhuc difficilis. Cum ergò vtrumque helleborum in vsu esset Hipp. tempore: simplici eiusdem appellatione etiam vtrumque apud eundem intelligendum, iure optimo nobis dubitare licebat.

Quod autem, & vtrumque helleborum Hipp. tempore in vsu esset ad morbos profligandos, præter ea, quæ modò afferebamus, luce clarius efficitur lectione eiusdem Hipp. quando in operibus ipsius adeò frequenter nigrum vsurpatur helleborum, atque album. Nimirum nigri meminit Hipp. in 3. de

de morb. præsertim cum de tetano ,  
Huic inquit catapotia ex pipere , &  
veratro nigro deuoranda dato.

SUCCESSIUE ibidem eodem auxilio  
vitur in opistotano .

De internis affect. cum etiam de ter-  
tio affectu typhos dictus peragitur ; sæ-  
pè verò inter eundem etiam ipsi geni-  
tura exit . huic cum sit habuerit , ven-  
trem nigro veratro purgato, *τὸ ἀπὸ Ἰν-  
λονόπ*, supernum videlicet. infernum.  
verò scammonia succo . hunc locum  
vel non perspectum , vel duriori cor-  
tice tibi visum esse mihi persuadeo Ca-  
stelle , atque propterea intactum reli-  
queris .

Ibidem de alio morbo crasso. Si ve-  
rò à bile morbus , legitur , veratrum  
deorsum purgans ipsi bibendum dato ;  
aut scammonia succum .

Et de alio hepatico affectu : Huic cū  
sic habuerit , veratrum purgans deor-  
sum

sum bibendum dato, cnidio cocco subpurgato.

Quemadmodum in 5. epid. Androphani vocis interceptione affecto veratrum nigrum fuit exhibitum, neque biliosum prodibat, sed modicum.

In lib. de morb. mul. 1. veratro nigro pro subditiōe utitur Hipp.

Ibidem veratri nigri etiam ad subdendum meminit.

Ad foetum corrumpendum, & expellendum, veratri nigri tres obolos præscripsit.

Et paulò inferius eiusdem veratri nigri duas potiones.

Pro expulsorio mortui foetus ibidē nigro veratro utitur Hipp. vel simpliciter, vel admixtis contrariis, & supponendo.

Secundo de morb. mul. fabricatur corrosivum cum veratro nigro, & Sandaracha.

Libello de sterilibus, subdititium ex melle, & nigro veratro cōponitur.

De victus rat. in morb. acutis, cum agitur de pleuritide: si verò sub septo transuerso fuerit dolor, ad clauiculam autem de se significationē non præbeat aluum mollire oportet, aut veratro nigro, aut peplio.

In eodem libro paulò inferius. Ducit autem nigrum veratrum melius, & ad iudicationem commodius, quam peplium.

Ibidem ad peripneumoniam. Nux pinea, & galbanum in melle actico: Abrotanum in aceto mulso, piper, veratrum nigrum feruefacito, & pleuritico in principijs, dum dolor vexat bibenda dato.

Et denique in lib. de Vlceribus, veratro nigro bis vtitur Hipp. ad pharmaci compositionem pro quodam ulcere. atque in lib. de hemorrhoid. ad

earundem curationem, nigro helleboro vtitur.

De albo autem helleboro mentionē reperij in Hipp. 2. de morb. in ordine ad quartanam. 3. de morb. cum de peripneumonia. primò de morb. mul. quādo veratro, inquit, exhibito ad vomitum faciendum. & in lib. de vict. rat. in morb. acut. Vbi quiquūque infernū ventrem calidum habent, & alui egestionēs acres, & inæquales sunt, veratro albo his reuellere oportet. sicuti inferius alium affectum curando, per veratrum sursum purga legitur.

Desumpta igitur argumentatione, ab usu, cum utroque, tam albo, quam etiam nigro vteretur Hipp. iure optimo vtrumque intelligi simplici appellatione hellebori dubitabamus.

Quamquam ex altera parte non negauerim per plura inueniri in Hipp. loca, ex quibus album solummodo, appel-

appellatione simplici; intelligendum videatur helleborum.

Nimirum 2. de morbis cum de fi-  
entibus à capite affectibus agitur: Po-  
stridie veratrum bibendū dato, inquit;  
Hipp. deinde medicamentum deor-  
sum purgans exhibeto.

Ibidem de alio morbo. Veratrum  
dato temperatum, vt ne aluum infernā  
moueat. quemadmodum paulò infe-  
rius, eodem modo tribus alijs vicibus  
hellebori meminit.

De alio morbo. Veratrum dato, sed  
per inferiora aluus non moueatur.

De pituita alba. Veratrum bibe-  
ndum dato. & caput purgato, & postea  
deorsum purgans bibat.

In totò inquam 2. de morbis ferè  
simplici hellebori appellatione album  
intelligit Hipp.

In lib. de affect. cum de splenis agi-  
tur affectibus, & in Vere sursum per



veratrum purgantur, habemus.

Ibidem de profluvio ventris: Hunc fursum versus resiccato, veratro in potu dato, & capite pituita purgato, ventrem quoque lacte cocto eluito.

De internis affect. cum de pulmone inflammato. fursum per veratrum ipsum purgabis, docebat Hipp.

Quemadmodum inferius de tribus tabis speciebus agēdo. Et primum quidem veratrum bibendum dare, infra, autem subpurgare epithimo, aut peplo, aut grano cnidio, aut titimalide.

De aqua inter cutem à splene. Hūc à principio curato, & fursum quidem veratrum exhibeto. deorsum verò Cneorum, aut hippohais succum, aut cnidium granum.

De altero morbo regio. Veratrum bibendum dato, ventrem verò infra, subpurgato per succum, velut priori.

Cum de morbo crasso. Huic cum

E ita

ita habuerit, ventrem purgato, deorsum quidem per hippophaes, sursum autem per veratrum.

Secundò de morbis mul. de subfluxu, veratrum ipsis dato, legitur, deinde pharmacum deorsum purgans intermissis diebus.

Inferius, pharmaco deorsum purgans dato, & si quidem potens fuerit veratro.

Cum vteri apud præcordia constiterint, suffocatur velut à veratro.

Secundo epid. de viro Athenis à cholera capto. Hic veratrum in lentium succo bibit, & postea vomuit.

Qui ex Eubæa venit, cum purgatione sursum opus habere putaret, non validam radicem veratri bibit.

In Phœnicis affect. cum vomitus facti fuissent, & dolores auertebantur. Sed & venæ sectio proderat, & veratri potio.

Sexto. epid. in principio circiter, dolore renū affectis, veratro purgare, si iuuenes fuerint. Gal. in comm. albo cum veratro interpretatur.

Lumborum dolore pertinaci affecto, & ampliori subductione, à veratro vomere spumosa multa prodest. In coacis docebat idem Hipp.

In aph. cum de veratro simpliciter semper album intellexit Gal.

Hæc sanè in rem tuam cadere, tibiq; summoperè placere mihi persuadeo Castelle. Sed quid adhuc alia dices eiusdem Hippocratis?

In lib. 1. de diætâ agens Hipp. de quadam tardiori insaniæ specie: Confer itaque his, inquit, fomentis uti, & veratri expurgari. veratri inquit in plurali numero.

Quemadmodum propè finem, cum de alia specie insaniæ: Conueniens est

Et 2. vnde etiam

etiam Vere veratris purgare.

Tertio de diætâ , agendo de repletionē . si curam celerem facere velit , veratro purgandus est.

In lib. de infomnijs ad præcauendâ infaniam : conducit his veratri purgatio . An utroque helleboro non occurratur infanis , nullus docuit , vt alio loco declaramus .

In lib. de internis affect. cum de renum morbo . huic cum sic habuerit , elaterium bibendum dato , vel tapfiæ radicem , aut veratri , vel succum scamoniæ .

Ibidem , morbum regium cum veratro curabis . an hicteritiæ vtrumque non conueniat ? absit à nobis hoc paradoxum . quinimo ex parte affecta indicatione sumpta , magis nigrum , quàm album in hicteritia conuenire affirmarem .

De typhode affectu , veratrum dato  
etiam

etiam legitur inferius.

Primo de morbis mulierum curando illas, quibus sexta die, vel septima à viro immissa prodeunt putrefacta; Curare autem oportet per veratrum, aut scammoniam, aut peplium. adducebamus hunc textum alibi, quo quid clarius?

Ibidem pro subditio veratrum exhibet, at vtrumque veratrum subdi valet, subditumque conferat.

Ad vteri corroborationem veratri potiones duas, in vini dulcis heminis duabus dilutas infunde, docetur ibidē, & paulò infra repetitur.

Secundo de morbis mul. Cum sic habuerit pharmacum bibere oportet. & si quidem fortis fuerit ex veratro; si verò debilis radicem, & elaterium.

Cum vteri exciderint in recenter enixa, veratro purgare oportet, etiam inquit Hipp. & si non satis fuerit etiam

vomitum facere, & non lauare, tacereq.  
 & quiescere. Vomitus facit ab helle-  
 boro. Ergo non de albo prius loque-  
 batur Hipp. Cum vterus strangularit, veratrum  
 ad nares admoueto ibidem docet.  
 Vtrumque tamen veratrum ad hoc va-  
 lere potest.

In ultimo eiusdem 2. de morbu mul.  
 ad infusum pro dysenteria helleboro  
 vtitur simpliciter dicto.

De sterilibus, cum menses mulieri  
 prodierint, & praterierint, primum  
 quidem caput purgare oportet: dein-  
 de veratrum exhibe.

Sexto epid. sect. 5. Eum qui vera-  
 trum bibit lauare, & comedere.  
 Cleocho 7. epid. Veratrum bis exhi-  
 buit Hipp. & sexagesima die secunda,  
 vice. Ideoq. verisimilius de nigro, qua  
 albo hic esse sermonem.  
 Calligeni, ibidem, veratrum non

profuit. *unelav non amil et otodell*

Veratrum præterea dato his quibus à capite fluxio fertur. an fluxioni utrūque non conveniat helleborum Castelle. *the ramanellor; norebiv*

Sesamoides fursū purgat, potio eius est drachmæ dimidium in aceto mulso tritum commiscetur etiam veratris. In lib. de articulis, cum de his qui in calcaneum vehementer, se fulciunt. Præstat autem, & veratrum bibendum dare. Utrūque veratrum, quinimò nigrum magis huic affectui convenire valeat, ut pote alibi dicebamus. *unelav non amil et otodell*

In lib. de fracturis, curans illos, quibus femoris, aut bracchij os extra eminet. Vbi verò reponis, inquit Hipp. veratrum molle bibendum dare oportet. An femora, & bracchia per eandem partem purgationem exoptent, & utrum eadem affectæ partes, utroq.

helleboro sanari non valeant? sanè id affirmare ridiculum esset.

In lib. de articulis, cum de luxatione ossium tibiæ. & denique veratrum mihi videtur profuturum esse. vt autem in tua epistola indicas, huiusmodi in casibus, diuerso tamen modo, vtrumque helleborum expedit.

In epistola insuper ad Hippocratem Democritus, his verbis alloquitur. Accessisti ad nos veluti insanos, o, Hipp. veratrum nobis daturus persuasus à viris stolidis, apud quos labor virtutis insania iudicabatur.

Et paulò inferius, veratrum enim sanis datum menti tenebras offundit. insanis autem valde prodesse consuevit. Vtrumque tamen helleborum insaniæ conuenit, necnon etiam menti tenebras offundere valet.

Et denique 2. de morb. mul. cum de tabe, veratrum bibendum est legitur.



tur. An album sit veratrum, quod tabidis conducatur? Profectò cum eodem Hipp. 4. aph. circa initia, nequaquam esse, respondendum. quando tabidos per inferiora, cauentes superiora purgari oportere ibidem legatur. Vnde nigrum, simplici dictione veratri hic intelligitur. Cum etiam his omnibus accedat, quod Hipp. pluries, veratro sursum purga inquit. Si veratri simplici dictione album intelligeretur. ad quid suprà addere?

Ex his igitur, & alijs, vtrumque helleborum, non album solummodò, simplici dictione veratri intelligendū esse, non iniuria dubitasse. Condiscipulos tuos, manifestè apparet eruditè Castelle.

Et si ampliùs dubitationis originem in Hipp. quæras: An quia non omnes qui circumferuntur Hipp. nomine libri, eiusdem sint accroamatici, & vere

rè

re ipsius? Namque Gal. 6. de decretis Hipp. & Plat. cap. 3. 26. & alibi, In animo habui, inquit, commentarium scribere de germanis, verisque Hipp. libris. Ideoque ut fortasse diuersorum sunt, qui dicuntur Hipp. libri: ita etiā circa helleboros diuersa leguntur loquendi formæ, modò scilicet nigrum modò album simplici appellatione hellebore significantes: nunc verò vtrūque, ut superioribus ad satietatem usque ipsi probauimus. Ab hinc amplius circiter trecentis annis, cum albo penitus excluso helleboro, nigro solum vtantur recentiores. Ergo vel vtrumque, vel nigrum potius intelligendum, quando helleborum simpliciter à medicis nominatur.

Ratio autem, cur albo relicto, libentius nigrum vsurpent neoterici, diuersa, & multiplex est apud medicinæ Doctores. Eurnius enim 2. meth. ad

pra-

proxim. cap. 21. ex Orib. lib. 7. collect.  
cap. penultimo, & lib. 8. scribit veteres  
ab eius sæpè usu interijisse, quod mos  
præparandi eos lateret. cap. autem 24.  
eiusdem libri Veteres, inquit, hellebori  
succo, alij folijs, alij semine, alij ra-  
dicibus utebantur: tandem ratione, &  
experientia edocti, tantum radicibus  
utimur. Quare Plin. scripsit helleborū  
quondam terribile, postea tam promi-  
scuum effectum, ut plerique studiorū  
gratia, ad preuidenda acrius, quæ cō-  
mentabantur scriptitarent. Verum ut  
prodidit Oribasius, accuratè hellebo-  
rum castigabant, & foris quoque tutō  
ad mouebant: hæc ratio ferè nos latet,  
cum antiquorum scripta de parando  
helleboro interciderint. scripsit olim  
eius tecmarsum Philonides Siculus En-  
nensis, cuius meminit Diosc. lib. 4. &  
Hipp. cuius scripti de helleboro adhuc  
initium superest. Et denique lib. 3.  
meth.

meth. ad praxim cap. 8. cur autem, legitur, veteres helleboro, Elaterio, reliquisq. strenuissimis remedijs perpetuo ferè vterentur, mitiorum ob inopiam fuisse existimarunt quidam. Nos putamus eos audacter, & frequenter eorum vsum inijsse, quod tutissimas eorum præparationes compertas haberent, vt innuit Gal. in lib. de articulis. Horum autem scripta interiere; etenim Hipp. de helleboro; libri initium dumtaxat existit. Scribit Diosc. lib. 4. præparationem corporis, & hellebori, ac victus rationem ad vsum hellebori, diligenter olim descriptam fuisse à Philonide Siculo Ennensi. foris tutò interdum helleborum balneis, & linimentis includebant, vt notat Oribasius. Hinc nostra calamitas, quod, dum mitiora sectamur, occasio curandi pereat, atque ex curabili, incurabile malum euadat. Attamen in usu

magno-

magnorum pharmacorum nullus temeritati locus esse debet .

Idem Eurnius in lib. 2. de vict. rat. in morb. acut. com. tex. 21. de Helleboro albo agens . Eius vsus, inquit, hoc seculo suspectus est, quia ab eo plurimi in conuulsionem inciderunt .

Mercurialis lib. 2. prelect. cap. 8. Habuerunt veteres , inquit , & etiam tempore Hipp. varios modos exhibendi helleborum , atque præclarissimos , & tutissimos, vt narrat Oribasius 7. collect. Conqueritur tamen Gal. 3. com. de fracturis , suo tempore desisse modum præparandi helleborum, eo quod Hipp. eum non tradidisset .

Nonnulli autem hellebori albi vsu proinde dubium suspicatur : quoniam corpora nostra hisce temporibus aliquatenus eneruata , vberiore illius euacuationem perpeti non valent . atq. huius sententiæ Mesue, & Amatus Lufitanus

fitanus præsertim fuere, si rectè reco-  
lor, cum aliquibus alijs. Quæ tamen  
sententia difficillimæ probationis est:  
quando cum Manilio Astronomico  
primò.

*At manet incolumis mundus, suaque  
omnia. seruat,*

*Idem semper erit, quoniam semper fuit  
idem.*

De eodem helleboro mirabilia re-  
ferunt Apoll. de mirab. hist. Atque  
Theophrastus cap. 18. lib. 9. de histor.  
plant. Nimirum Eudemum Chium  
duas, & viginti hellebori potiones, in  
foro, vna die hausisse, nec quicquam  
purgatum esse, cum verò iuit lotum, &  
cœnatum, vti consueuerat, neque vo-  
muit. Mercurial. lib. 2. variarū lectio-  
num cap. 25. id in consuetudinem re-  
tulit: Quamquam id ita factum ab eo-  
dem Eudemo refert Theophr. ibidem,  
vt post septimam potionem pumicis  
pulue-

puluerem aceto subactam ad compri-  
mendum hellebori vim, bibisset.

Quidquid autem sit de his, satis su-  
perq; probatum mihi sufficiat, falsissi-  
mū esse apud omnes simplici hellebo-  
ri appellatione album intelligi, ut tu  
ipse Castelle in prima ipsa Epistolæ fa-  
cie asseuerando errasti: Quinimō apud  
ipsummet Hipp. res adeo est contro-  
uersa, ut qui nos reprehendis, Hippo-  
cratem ipsum reprehendere videaris.

Neque obstant, quæ ipse opinionis  
tuæ confirmandæ gratia, insuper ais.  
Quandoquidem, tamen in lib. de ve-  
ratri usu Hipp. de superna purgatione,  
ut plurimum agat: nihilominus, ut  
ipse affirmas, de eadem non semper:  
cum in fine hæc habeat, quando de Sc-  
famoide agit, commiscetur etiam vera-  
tris tertia potionis pars, & minus suffo-  
cat. Veratris, inquit, τοῖς ἑμβροσιν  
gracè, & in plurali numero. Ergo de

utroque

utroque helleboro etiam fortasse ibidem Hipp. agebat.

In fol. 13. Epistolæ, quamquam, inquis, in numero plurali, & veratris dicat Hipp. nihilominus de veratro albo intelligit: Sesamoidem nimirum veratris admisceri, ut non suffocet, veratrum album scilicet. Sed quis quæso vocū nexus sit iste? Veratris per te admiscetur Sesamoides, ut non suffocet. ut non suffocent; si de helleboris intelligit Hipp. legendum esset. Enimvero à viro qui herbariam scientiam maximè sibi vindicat, hic locus absquè maiori explicatione relinquendus non erat.

Quomodocumque autem id se habeat, licet in hoc eodem libello de Veratro, de vomitatorijs plurimum scripta legantur: attamen docturos Hipp. hellebori usum, & in ordine ad infantes, verisimile est etiam de nigro verba fecisse. Non legimus autem æquè  
copio-



copiosam de nigro, atque de albo ibidem tractationem; quoniam, inquit Eurnius in arg. ad com. de purgatorijs remedijs, Hipp. existimo hunc librum de helleboro olim scriptum fuisse, ac totum interiisse, excepto hoc eius initio. Neque hoc mirum videri debet, cum tot calamitatibus hactenus attrita fuerint Hippocratica scripta. Posteaquam enim conflgrasset bibliotheca Alexandrina, & quæ ex Hipp. scriptis restibilia erant collegissent Artemidorus Capito, & cognatus eius Dioscor. Alexandrini, Adriani Imperatoris temporibus, plurimum ipsi intulere damni deprauando.

Accedunt his barbaræ tempora, cū labente Rom. Imperio, tota litteratura ad Arabas in Marocum translata fuit ab Almanfore Rege, extincto græcæ, ac latinæ linguæ nitore. Hæ tenebræ perennarūt vsque ad Gratian. Decreta-

lium Authoris tempora, cum Salernitana Schola Hippocratis aphorismos, ex Arabica, in latinam fœdè linguam, translatos cognoscere cœpit. Quare minimè mirum, si quædam interci-derint, & quædam mutila, ac lacera, ad nos deuenerint.

Secundò in fol. 14. Ideò etiam helleborum album simplici appellatione; intelligendum esse concludis: quoniã in vnoquoque genere semper id, quod præstantius intelligendum est. Sed album nigro præstantius. ergò.

Minor falsissima est, tum quia si album præstantius, frequentius quoque in vsu esset, quam nigrum, quod non videtur. tum etiam quia album, & nigrum helleborum comprehenduntur sub genere generalissimo, at non sub alterno: quando album per superiora, nigrum verò per inferiora purget.

Et denique recedere non deberes à

do-

doctrina Martiani tui Charissimi do-  
centis nimirū in explicatione sui aph.  
concocta, appellationem medicamen-  
torum ab usu deriuari . Sed sic est non  
semper album , nigro vsitationē fuisse .  
Ergo falsa est propositio tua , hellebo-  
ri simpliciter appellatione semper , &  
quandocumque album intelligendum  
esse : quando vt superius luce clarius  
probabamus, apud Arabes nigrum, &  
frequenter quin etiam apud Latinos,  
iac nonnullos Græcos vtrumque intel-  
ligitur . Quinimò & hoc ipsum pari-  
ter apud Hipp. valdè dubitabile est .  
cum non album solummodò, sed ni-  
grum quoque ipse vsurparet .  
Tertio in fol. 15. Ideo semper no-  
mine hellebori simpliciter apud Hipp.  
album intelligendum esse ais : quoniā  
loquuturus de helleboro albo, raro al-  
bi cognomen addidit . cum autem de  
nigro, semper ipsum distinguit .

Distinguitur sanè secundum subiectam materiam, modumque loquendi, non autem cognomento semper nigrum helleborum iuxta Hipp. in lib. de internis affect. vbi curaturus alium morbum crassum, veratrum inquit deorsum purgans ipsi bibendum dato. Ibidem cum de alio agitur hepatico affectu: Huic cum sic habuerit, veratrum purgans deorsum bibendum dato, & cnidio cocco subpurgato. Qui ramen loquendi modus in Hipp. non magis de nigro fuit, quam de albo. Vnde in 2. de morb. cum de alio morbo; Veratrum, inquit, dato temperatum, vt nè aliud moueat. In lib. de affect. cum de splenis agitur affectibus: Et in Vere sursum per veratrum purga. Ibidem, Hunc sursum reficcato exhibito veratro. De internis affect. cum de pulmone inflammato, sursum per veratrum purgabis. Sed pluries hunc

hunc loquendi modum in Hipp. reperiemus.

Quarto , vnde notate , inquis in fol. 24. non solet Hipp. æquiucè loqui in re præsertim tanti momenti . Abstinnisset opinor Marfilius Cagnatus Doctor noster iuxtà modestus , ac sapiens vir , si iam viueret , notate dicere . Tu verò qui Marfilius non es, confidentissimum istud notatè , non sine nota æqualium , & condiscipulorum aurbus tuorum inculcas . Profectò nobis notate dicere insufficiens es tu Castelle.

Ad rem autem, Hippocratem si bene animaduertas , sexcentis in locis , vt ita dicam . æquiucè loquutū inuenies.

Quando enim nosceremus, subiungis , quando albo , & quando nigro vtendum , si simplex hellebori vox vtrumque æque significaret ?

Respondetur secundum subiectam materiam, atque per verba antecedentia

tia, vel subsequētia facillimè nosci.

An eadem vtriusque vis etiam quæris?

In ordine ad finem, sanè eadem ferè, quando eisdem proſit nigrum affectibus, atque album: in ordine autem ad modum, nequaquam; cum album per superiora, nigrum verò per inferiora purget.

An alterum pro altero indistinctè sumi possit?

Amatus Lusitanus in enarrat. in Dioscor. superius adductus, Albi radices, & nigri, inquit, in usu medico frequenter veniunt, quibus Prisci indiscriminatim utebantur, non plus albi radices, quam nigri ægrotis dando. Sed albi potius pro euocando vomitu: nigri verò pro aluo subducenda. Et sic nullam ponimus in Hipp. confusionē, nullumque crimen, siue falsum, ut ipse pluribus in epistola loqueris.

Sed

Sed accedamus ad reliqua , de simplici dictione hellebori , vt dubitarem<sup>us</sup> quatuor præsertim Hipp. loca in causa fuere . nimirum primus in lib. de insomnijs in ordine ad insanientes erat . Secundus in lib. de fracturis . tertius & quartus in lib. de morb. mul.

Circa primum ex lib. de insomnijs , ita loquebamur in fol. 26. In ordine ad insanientes helleborum adducitur sine vlla adiectione , in quo casu affirmandum est , vel de vtroque Hipp. orationem fuisse , vel potius de nigro solum : cum ad insaniam conferre nigrum etiam referat Diosc. non autem album , vt videre est lib. 4. superius allegato tex. 134.

Ad hæc conaris primò cum Hipp. ipso demonstrare , nequaquam de vtroque ; at de albo tantummodò hic intellexisse eundem Hippocratem . Et primò quoniam purgatio ibidem per vo-

mitum quærat, non verò per inferiora .

Sanè ad insaniam præcauendam conferre interdum vomitum non irem inficias: at nigrum quandoque magis congruere, nec etiam negari potest . Vnde cum Hipp. omnibus autem, inquit ibidem, conducit, vt veratro purgati, optimam victus rationem instituant, de vtroque helleboro sentiendum est: nimirum prout nigrum, vel album indicari magis videbitur; ita etiam à Medicis vnum, vel alterum offerendum esse. quando de alijs insomnijs inferius, Mare perturbatum, legitur, ventris morbum significat; sed oportet aluum mouentibus, leuibusq. & mollibus expurgare. ita etiam bilis illa, ex qua insania periculosa est ne succedat; prout in vno, vel altero loco reperietur, cum vtroque veratro euacuanda est. Et sic defenditur primus  
locus



locus de insomnijs à me adductus .

Quem eundem Hipp. locum, ideò, amplius, vtri helleboro, siue potius nigro magis fauere affirmabamus, quod Diosc. nigrum insanis prodesse retulit, non autem album. hanc tamè coniecturam meam fallacem asseris, cum Diosc. albi veratri facultates intactas reliquerit, atque lectorem ad Philonidem Siculum remittat, & ne longior sit, illiq. assentiri nunc dicit.

Sanè coniectura mea in Diosc. si fallax, tua in hac re de Philonide Siculo fallacissima est. quando in eodem quoque Diosc. legere poteras ad Philonidem Siculum se remittere circa hellebori albi apparatus, victusque rationem, haud verò eiusdem facultates, vel vires. Et ad maiorem claritatem huiusmodi sunt Diosc. verba lib. 4. cap. 40. Apparatus autem, insuperque victus ratio vtentibus accommodata.

dili-

diligenter ab ijs tradita est, qui ex professio de ipsius dosi scriptitarunt, Sed maximè Philonidæ Siculo Ennæo assentimur. Nō igitur se remittit Diosc. ad Philonidem Siculum circa vires, facultatesque albi hellebori, vt tu ipse somnias Castelle, nostramque coniecturam impugnando fallaciter coniecturasti.

Et quoniam insuper ex Dioscoride nigrum helleborum, non verò album pro insanis laudari, recensebamus, tu qui dicendi occasionem quæritabas, vel potius alios couincijs vrgere profitearis, album ad insaniam valere aduersus me probare niteris: at quorsum ego nescio, cum huiuscemodi propositionem haudquaquam negauerim: quēadmodum vnusquisque volens in literis meis ad Martianum scriptis perspicere poterit.

Sed quid illud quod fol. 16. ais: Album

bum nimirum helleborum insanientium esse proprium enuncians. Ergò nigrum per accidens fortasse? Et nihilominus vtrumque helleborum humores extrahit, ex quibus insanix proficiscuntur.

Ideò album helleborum insanis proprium esse concludis, quoniam ex Hipp. 1. de diæta, confert habemus insanis fomentis uti, & à fomentis veratro expurgari. Ergò ex his tuis dictis indifferenter cuicumque insanix veratrum album conueniret? Atqui superioribus contrà, aliàs nigro, aliàs verò albo, cum Celso, in insanis utendum est: prout nimirum tristes, vel hylares erint, confirmabas: Accedens præterea insanos minus hilaritate concommittari, quam tristitia, ut multorum quoque exempla confirmant.

Atque primū Orestis, de quo Ouid. lib. 1. de tristibus ita cecinit.

*Vi*

*Ut foret exemplum veri Phocæus  
amoris,*

*Fecerunt furia tristis Oreste tua.*

Et Virg. lib. 4. *Aneid.*

*Aut Agamennoniis scenis agitated  
Orestes*

*Armata facibus matrem, & serpen-  
tibus atris*

*Quum fugit, ultricesque sedent in li-  
mine dira.*

Secundo loco accedit Pentheus, de  
quo Lucanus lib. 7.

*Nec magis attonitos animi sensere tu-  
multus,*

*Cum fureret Pentheus, aut cum de-  
fecisset Agaue.*

Ajax Thelamonis filius propter ar-  
ma Achillis mortui in virtutis præmiū  
Vlyssi data, dolore animi, & invidia,  
in furorem versus, armenta loro cede-  
bat, existimans se interficere Græcos.  
Vnde Apul. in *Metam.*

*In insani modum Aiakis armatus,  
Ut non ille viuis pecoribus infestus,  
Tot laniquit armenta,*

Et ne longiori oratione grauis tibi  
sim, pleni sunt quæ Poetarum, quæ  
historicorum libri furiosorum exem-  
plis, qui minimè hylares, verum è cõ-  
tra tristes magis fuisse leguntur. Mi-  
lonem Epyrotam, Athamum Æoli  
filium. Agauem Cadmi, & Herimo-  
nes filium. Lycurgum Dryantis fi-  
lium, Regemque Thraciæ. Mar-  
syam. Alchmeonem Amphiarai, &  
Eryphilis filium. Cleomedem Astypo-  
lentem. Charem qui in bello Cyrum  
vulnerauit. Euagoram Cypriorum  
Regem. Timantem Cleonæum. Ac-  
cam mulierem. Pylandrum. Camby-  
sem. Harthbenum Athletam. Lucre-  
tium Poetam, atque huiusmodi alios  
quis ignorat?

Sed quid ego huiusmodi petam  
exem-

exempla? furor, mania, vel infania,  
 quæ idem sunt apud Cœl. Aurel. lib. 1.  
 Chronicon cap. 5. & alios, potissimum  
 ex affatibile proficiscuntur. At hæc  
 tristitia infert, ut supra declaraba-  
 tur. Ergo infania per se, utque infan-  
 tia, tristitia ut plurimum afficit, per  
 accidens verò, & rarò hilaritate. Vnde  
 fuscantibus nigra magis, quam alba  
 congruant hellebora, & magis propria  
 denique erunt, contra ea quæ mordi-  
 cus Castelle censes. Cum etiam ex di-  
 cto Cœliq. Aurel. ibidem, maniam  
 Græci ex eo dicant, quod ægrotis ma-  
 gnâ faciat anxietatem, vel quod ani-  
 mum, siue mentem ultra modum la-  
 xet. manon enim dimissum, siue mol-  
 lem appellant, vel certe quod polluat  
 ægrotates: nam pollui Græci lymânin  
 vocant, vel certe quod desertam, siue  
 solitudinem cupientes faciat ægrotos:  
 nam Græci stitui, atque solitudinem

petere , monusthæ dicunt .

Secundus locus de simplici veratri dictione in dubitationem me ingerens, erat in lib. de fract. vbi præstat veratrũ, inquit Hipp. in ijs , qui vehementer se in calcaneum fulciuerunt , ex alto loco saltantes, eadem die, vel certè posteriori præbere . Cum autem ex Hipp. in aph. lib. 4. 18. Dolores quiquunque sint supra præcordia , per superiora purgari oportere significant ; qui verò infra, per inferiora . Ergò concludebamus, de veratro per inferiora purgante intelligebat etiam hic Hipp. ne ab aph. discors esset .

Ad hæc distinctione respondes : quãquam, scilicet, calcaneum sit affectum, reuulsionis caussa , euacuationem per superiora adhiberi , cum reuulsio per contraria fiat . cum autem est purgandum , subiungis in fol. 19. Concedo quæ sunt supra præcordia superius, quæ

quæ infra inferius purganda.

Sed ex hac tua loquutione nosse velim, in quo differat purgatio à reuulsione. an quia idem non possit reuellere, & purgare simul? sanè vt fateris purgatio, & reuulsio non semper contraria sunt; quinimò interdum idem. Sed magis propriè loquēdo fortasse euacuare dicere intendebas. differt nimirum reuulsio ab euacuatione: quoniam euacuatio in parte propria affecta celebratur; reuulsio vero in parte contraria, *ἀντίθεσις* hæc, illa verò *κατὰ* græcè appellatur.

Sed ad rem nostram redeamus, cum Hipp. in aph. Doloribus infra septum existentibus per inferiora purgandum docuit, supra verò per superiora. purgandum; inquit Hipp. & per inferiora hic intelligendum. Vnde nigro, non verò albo etiam vsum fuisse verisimile est.



Oblato amplius aliquo affectu semper primò reuellendum in eodem loco ipse indicas, nempe ibidē pag. 19. Ergò in infans, in quibus caput affici etiam affirmas, primò, & principaliter per inferiora cū nigro veratro pro reuulsione semper purgandum. Et sic ignorē sanè, vtrum ego, an tu ipse in Dædali labyrintho reperiaris. Iudicium esto sapientum.

Vltima dubitatio insinuabatur nobis ex lib. 2. de morb. mul. in quo talia verba Hipp. leguntur, cum de altero fluxu enunciatio fit. Cū sic habuerit, pharmacum deorsum bibere oportet, si quidem fortis fuerit ex veratro, si vero debilis, radicem, & elaterium. Sed elaterium per inferiora purgat. Ergò de veratro inferre etiam purgante intelligendum est hic veratrum simpliciter nominatum.

Ad hæc respondens aliam proponis

G      quæ-

quæstionem, & vomitatorijs videlicet  
deiectoria substitui valere. Quâvis ergo  
elaterium per inferiora purget, substi-  
tuitur, inquis, elaterium veratro albo,  
tanquam in debilioribus disconuenienti  
medicamento. Sed cur elaterium infer-  
nè purgans veratro albo substituitur?  
an quia non erant leuiora vomitoria?  
profectò huiuscemodi non tibi suffra-  
gatur subterfugium. Ideoq. aliud petēs,  
elaterium inquis per superiora etiā pur-  
gare: Quinimo & nos elaterium sup-  
ponis asserere per inferiora solum pur-  
gare. Sed res aliter se habet, & clarita-  
tis ratione hæc sunt verba mea ad Mar-  
tianum in fol. 27. Cū sic habuerit, do-  
cebat Hipp. pharmacum bibere oportet,  
si quidem fortis fuerit ex veratro,  
si verò debilis radicem, & elateriū. Ela-  
terium verò per inferiora purgat, quæ-  
admodum & idem Hipp. docuit in lib.  
de internis affect. vel alibi. Reperitur  
nè

nè hic dictio solum? Cur ergo falsa  
amicis tuis Castelle tribuis? sed ut puto  
hanc nactus occasione ostentare vole-  
bas te scire, elaterium per superiora  
quoque purgare: haud tamen ipse ne-  
gaueris, eisdem medicamento propriū  
esse magis per inferiora purgare, quam  
per superiora, ut Eronianus in Onoma-  
stico, *ιανεία* interpretatur, commu-  
niter pharmaca inferioris ventris par-  
tes purgantia. atque Gal. idem Clarius  
confirmans, in Exegesi vocum, nō mo-  
do dicit ex Syluestri cucumere factum  
esse elaterium: sed quidquid per infer-  
nas partes purgat sic dici. Vnde Ianus  
Cornarius Hipp. interpres plerumque  
elaterium, medicamentum deorsum  
purgans vertit, ut videre est in lib. de  
locis in homine pag. 69. vers. 41. lib. de  
intern. affect. 197. vers. 37. 5. epid. cum  
de Eupolemi morbo, & alibi sæpius.

Et hæc sufficiant ad ea quæ aliqua

responsione digna mihi visa fuere. Cœ-  
tera quæ de Marfilio Cagnato, de Phy-  
landro Colutio, & alijs inutiliter asser-  
uisti; responsione haud indigent. Va-  
nitas vanitatum, vt ait diuinum oracu-  
lum, & omnia vanitas. Sic vale, vale  
iterumque vale, amantissime semper,  
& Condiscipule Castelle.

Fi I N I S.

LIBRARIUS  
V. R. F. O. N. A. M. S. P. S. I. C. A. S. I. N. I. S.